

صفية نصار

خلفتى يامصر

أشعار

بالعامية المصرية

الطبعة الأولى مايو 2018

بطاقة الكتاب

عنوان المؤلف : خلفتي يا مصر
المؤلف : صفية نصار (شاعرة الجنوب)
التصنيف : أشعار
رقم الإيداع : 2018-10810
الترقيم الدولي : 978-977-6656-16-2
عدد الصفحات : 100 صفحة
رقم الإصدار الداخلي: 175
تاريخ الإصدار الداخلي: مايو 2018 (الطبعة الأولى)
تصميم الغلاف والتنسيق : دار النيل والفرات للنشر والتوزيع

جميع حقوق الطبع والنشر محفوظة للشاعر، ولا يحق لأى دار نشر
طبع ونشر وتوزيع الكتاب الا بموافقة كتابية وموثقة من الشاعر

دار النيل والفرات للنشر والتوزيع

ثورة مصرية تشرق إبداعا على الوطن العربي

رئيس مجلس الإدارة

ناجى عبد المنعم



رخصة مزاولة مهنة: 58365 - سجل تجاري: - 2017 / 13242 - بطاقة ضريبية: 35-01-572

عضو عامل باتحاد الناشرين المصريين رقم 941 لسنة 2018

هاتف: 020554372901 - 01116202218 - 01011256943 تيفاكس: 01202541192

[f](https://www.facebook.com/alnilwaalfourat) [i](https://www.instagram.com/alnilwaalfourat) [y](https://www.youtube.com/channel/UC...) alnilwaalfourat@gmail.com

المقر الرئيسي: ج.م.ع. محافظة الشرقية - العاشر من رمضان - مجاورة 13 - امام سنتر الـ 13 - عقار 304

الإهداء

إلى مصر
الأم والوطن

ابنتك
صفية نصار

خلفتي يامصر

خلفتي يامصر وسنتي ضهرك
مطلعش ع الفاضي تعبك ولا سهرك
خلفتي رجاله قدرو يدفعو مهرك
بس مهرك كان عالي
زي اسمك ومقامك العالي
مهرك دم الشهيد اللي روي ارضك
ودمه امانه ولازم ناخذ بالتار
للي خلي ليك طلع له نهار
من بعد الظل نعيش احرار
وكلنا فدا شبابك وعمرك
وحق ابنك اللي حاضر واللي غاب

مش هنخلي فيكي خونه ولا ارهاب
هنقف اسود علي كل باب
نحمي حدود بحرك وبرك
خلفتي يامصر يام الهرم والنيل
خلفتي يامصر وادي الدليل
ابنك يابلدي ميعرفش المستحيل
خلي الفرحة تملي سماكي وارضك
خلفتي يامصر وسنتي ضهرك
وهترجي بلد الامن والامان ده وعد
ام الدنيا وقد الدنيا حضارة ومجد
والخاين لو جبل بعون الله هينهد
ولا ههدي ولاهرتاح إلا بنصرك

إفرحي يامصر

أفرحي يامصر يامه واتهني
وأطلبني من عنيا بس وأتمني
تشهد ميادينك وشعب واعى مطمني
وقفو وقفة رجالة انا عمري ماانساها
أحلف بترابك وبدم كل شهيد
وابنك اللي انكتب له عمر جديد
واللي واقف ع الحدود وعزمه شديد
واللي بيضحى لسه ويقول فداها
انا بحلف وده وعد مني قدام الناس
اصون ترابك زي الذهب والماس
وأطلبني قلبي وانا كلي حماس

روحي نفسي في حبك انساها
وهاكون عند حسن ظن الجميع
وقد المسؤليه ولاعمرى يوم ابيع
وحق بلدى وولدى مش هيضيع
دي مصر حبيبتي وانا عاشق هواها
مسلم مسيحي مصر لينا كلنا
رب واحد وطن واحد مجمع شملنا
ورئيسنا الشعب اختاره واحد منا
سيف على رقبة كل اللي عاذاها
يارب انصرني وعلى كل خاين قويني
وثبت خطايا وللخير وطريق النصرا هديني
وامشي زي ماقال الكتاب وربى ودينى
وانقش حروف اسمها بدمى وارفع
علمها من ارضها لسماها

مصر بتادي

اصحي يا ولدي مستني ايه تاني
علي صوتك اصرخ ضحي علشاني
لإمتي تفضل ضعيف خايف وساكت
عاجبك ذلي وراضي بهواني
سنين يقولوا عليا مديونه
بيرموا في بير ويملوا في شونه
انا خيرى ع الكل مش عايزه معونه
وبرفض وبصرخ بالصوت الحياني
مات الضمير وانعدم الإحساس جواهم
الجشع والطمع ملاهم وعماهم
فاكرينها دايمه ولاهياخدوا حاجه معاهم

اللي بيزرع بيحصد وهو وحده الجاني
مش هيزرع شوك وهيجني ورود
وكل اول له اخر وللصبر حدود
وكفاية كده لكل فعل ردود
انا اللي قاسيته وشفته منكم كفاني
واللي بيزرع خير أكيد يلقاه
وانا مش قليلة ولا بقول يامحسنين لله
انا ام الدنيا واسمي العالم كله يتمناه
انا هبة النيل سر الوجود والحياء
انا من نيلى انكتب موال واغاني
ولا اقدر اوفي ولا اكفي مهما اقول
انا الحضاره وللعلم مناره وتاريخ موصول
انا مصر الحرة انا بنت الاصول
والعزة والكرم اسمي والشرف عنواني

خلصت خلاص

خلصت خلاص

جبت اخرك معايا

لاشفت منك إخلص

ولا حسيت هوايا

افتكرتك بر أمان

وليا في قلبك مكان

وهتسمع يوم ندايا

اتاريك قاصد تحير فيا

وانا مفيش حاجة بايديا

مبشوفش غير صورتك في عنيا

قبل صورتي في المرايا

بشوفك وانت مش جنبي
اقرب لي من احساس قلبي
اقول ايه تاني ياكد حبي
وانت بايعني م البداية
حبيبي حكم قلبك وضميرك
مليش حبيب ابداء غيرك
قلبي ملكك واسيرك
ارجوك ارحمني كفايه
اقولك خلصت خلاص
وضيقت اجمل احساس
انا بنيت من غير اساس
وانت هديت الامل جوايا

أشوفك ثانية

اشوفك يا حبيبي ثانية
وادفع من عمري سنين
إنتي عندي بالدنيا
انا ليا غيرك مين
حبيبي تعالي خدني
ياتيجي تسكن حضني
قلبي و عيوني مشتاقين
وحشني يا قلب قلبي
وحشني ياروح الروح
حبيبي حياتي ياكل حبي
قلبي معاك بين ماتروح

دايب فيك حنين
انا مش اد السهر طول ليلي
قولي حبيبي طريقك فين
انا قلبي دليلي
وعارف سكة العاشقين
ومش هيتوه ابدأ يا عين
دي الجناين اللي طرحها فل وياسمين
واشوفك يا حبيبي ثانيه
وادفع من عمري سنين

خساره فيك

خساره فيك إحساس قلبي
لوحتي هيبين زعلي غضبي
خساره فيك اي حاجه مني
حتي العتاب لو غصب عني
خسارة لو هتشوف دمعتي
او تحس مرة بقسوتي
القسوة احساس م القلب
برضو خساره فيك
انابكره عنيا تشوف عنيك اللي حبيتها
وبكره ايديا تلمس ايديك اللي حسيتها
وبكره اي غنوه معاك انا غنيتها

وبكره روجي كل ماتفكرني بيك
مش عايزة اشوفك لو صدقه
ولوني خلاص مبقتش خايفه
ازي اضعف وانا مش شايفه
اي حاجه م اللي حبيتها فيك
موت جوايا اجمل احساس
خليتني اخاف من كل الناس
راجع علي اي اساس
انا حبي مكنش ليك
خسارة خسارة فيك

بنت عمري

قالو عليكي شبه القمر
قلت القمر هو اللي يشبها
دي زي الملايكة و البشر
من جمالها احتارو مين يوصفها
القمر واخذ من نورها وضيها
شوفو شوفوا العيون السود
ولا الخدود اللي بتطرح ورود
اسمعو صوتها الحان ونغم عود
في جمال بالشكل ده لا
مفيش لاقبلها ولا بعدها
في الحلاوه ملكيش زي

من صفين اللولي شايف ضي
ينور الف شارع ومية حي
لو بس تتبسم ويبان سنها
دي بنت عمري أول فرحه
منى عيني أشوفك بالفستان والطرحه
وفي عين الحسود واللي مايصلي
شطه وملحه
ويارب تمم وكمل بالخيراجمل الليلي
ليلة العمر وزغرووووته
لأغلي الغالين وحببية امها

افرحي يامصر يامه واتهني

واطلبني من عنيا بس واتمني
تشهد ميادينك وشعب واعى مطمئني
وقفو وقفه رجاله انا عمري ما انساها
احلف بترابك وبدم كل شهيد
وابنك اللي انكتب له عمر جديد
واللي واقف ع الحدود وعزمه شديد
واللي بيضحى لسه ويقول فداها
انا بحلف وده وعد مني قدام الناس
اصون ترابك زي الذهب والماس
واطلبني قلبي وانا كلي حماس
روحي نفسي في حبك انساها

وهاكون عند حسن ظن الجميع
وقد المسؤليه ولاعمرى يوم ابيع
وحق بلدى وولدى مش هيضع
دى مصرحبيبتي وانا عاشق هواها
مسلم مسيحي مصر لينا كلنا
رب واحد وطن واحد مجمع شملنا
ورئيسنا الشعب اختاره واحد مننا
سيف على رقبة كل اللي عاذاها
يارب انصرني وعلى كل خاين قوينى
وثبت خطايا وللخير وطريق النصر اهديني
وامشى زي ماقال الكتاب وربى ودينى
وانقش حروف اسمها بدمى وارفع
علمها من ارضها لسماها

يرضي مين

يرضي مين عمايك ديه

يرضي مين ظلمك ليا

توعد وتخلف واقابلك بتحلف

مش طبعك آسيه ودايب حنين

طب هو فين ويرضي مين

صدقني خلاص مليت

من كتر ما قسيت

وكرهت الحب اكر م اتمنيت

وندمت علي حب السنين

وده يرضي مين

مبقاش في العمر باقي

تحير قلبي واشواقي
ليالي بعاد وثواني تلاقي
وأجيب الصبر منين
وده يرضي مين
معقوله يا حبيبي فنواني ودقايق
هطفي نار شوق تشعل حرايق
ده صعب جدا وشيء يدايق
وميصحش ابدأ في دنيا العاشقين
وده يرضي مين ظلمك ليا
بتوعد وتخلف واقابلك بتخلف
مش طبعك آسياه ودايب حنين
طب هو فين وده يرضي مين

كان أملي

كان أملي اسمع منك
اول كلمه ودقه علي بابي
وم اللي شفته انا منك
إتهيألي من حبي إنك
هتسعد عمري وشبابي
وتشاركني اي فكرة
وجوه عيوني تقرا
كل صفحه في كتابي
لقبتك مش بتغير
وبعدك قرب لي كتير
وانا من غير تفكير

بينت لغيرك إعجابي
مكنش ردك ليامعقول
كان قلبك بغيري مشغول
خفت إنتظاري يطول
ولوحدني اعيش بعذابي
ماصدقت الفرصه تجيني
نسيت شوقي ليك وحنيني
مادمت يا حبيبي إنت ناسيني

هوه لسه فيه وقت

بتقولي استني كتير
قولي ثانيه.قولي اتنين
حبيبي متقولهاش تاني
انا اخر صبري ثواني
حبيبي طول الوقت بفكر
مين للتاني بيعشق اكر
وعايزيني استني واصبر
تقدر تقولي الاقي الصبر فين
هوه لسه في وقت.هنضيعه
ولا عمرنا هنقدر نرجعه
ولا قلبي حمل اهه توجهه

تعبنام الشوق ايام وسنين
وكل وعودك ابعدم الخيال
مبقاش عندي قوة ولا احتمال
وانت ولا مره. قلبك رد لي سؤال
ولاحس معني الحب ولاطعم الحنين

إحنا شباب 25

عايزين الحياة ترجع وتعود

عايزين اللي يوفو بالوعود

تبقي مصر جنه ملهاش حدود

احنا شباب ثورة خمسة وعشرين

اللي وقفنا ملايين والوف

اللي كسرنا جدار الخوف

وقولنا لا للظلم والجبارين

قولناها للكبير قبل الصغير

حاجات كتير لازم تتغير

ومهما طال الظلم عمره قصير

وهانشوف نهاية الخائنين

صوت الحق دايمًا عالي

بسمعه ودايما علي بالي
وألبي يامصر النداء الغالي
احنا رجاله مش لسه صغيرين
مسلم مسيحي نحميكي
وياويله اللي يحاول يعاديكي
ومن كل المحن هنعدكي
ده حق واجب علينا ودين
يامصر يا غاليه انتي امي
فداء اسمك روعي ودمي
وانا واخويا علي ابن عمي
اعداء الوطن باسم الدين
اللي يخرب ويدمر بلد الامان
اللي يقتل ببشاعه كدة اي انسان
مصربرينة منه وكل الاديان

وسماكي وارضك وكل البني آدمين
ومش هيروح دم ولادك هدر
هاناخذ تارنا م اللي بيهم غدر
وياوليهم من حكم القدر
ودعوة المظلوم لو بعد حين
دعوة كل اللي اتظلم في كل جيل
حتي اللي زارك وشرب م النيل
حسبنا الله ونعم الوكيل
كلنا في حب مصر نقول امين
بكرة نقف كلنا بين ايادي الله
يوم لاينفعك فيه مال ولا جاه
لا المناصب بتدوم ولا الحياة
ومصر باقيه ليوم الدين
مصر باقيه ليوم الدين

إزاي عدت عليك؟!!

حبيبي ازي دي عدت عليك
الكلمه اللي بيها تظمني
دنا من حسن ظني بيك
قولت لروحي قربت تفهمني
بس إنت حقيقي حيرتني
ومن اول مقابله سبتني
ونسيت معادنا وخسرتني
قربت لك بعدت عني
متجيش تقول غصب عنك
ويصورلك خيالك وظنك
اني اقبل عذر منك

ياللي من فرحة لقاءك حرمتني
انا مش هالومك انابلوم حالي
بصيت لفوق وطلعت في العالي
وده اكبر من احلامي وفوق خيالي
الفرق بينا كبير كان لازم تفكرني

نفضها سيره

انا مش قد الحب والحيره
ولاحمل عذاب النار والغيره
ماتيجي نفضها سيره
قبل مانعرق ربنا يهديك
مش كل شوية تقول وحشاك
وتصحي فيا حنين لهواك
وتخلي قلبي يفكر فيك
انا راضية بقلبي الخالي
ولاعايزة اشغل بالي
ارجوك سيبيني في حالي
وابعد عني الحلوة عنيك

انا مش قد الحب والحيرة
ولاحمل عذاب النار والغيره
ماتيجي نفضها سيره
قبل مانغرق ربنا يهديك
احنا علي شط الهوي خلينا
وبلاش الموج وسط التيار يرمينا
ليه نرضي بالحب وحكمه علينا
ماتيجي نفضها سيره
قبل مانغرق ربنا يهديك

ياريت

ياريت قابلتك من زمان
من قبل الزمان بزمان
ولا عشنا يوم في ندم
ولادوقنا من كاس الحرمان
بس ياخساره لقانا اتاخر جد
ووصلنا النهايه من قبل مانبدأ
وانا في الحياة عندي مبدأ
والحب يعني احساسى بالامان
حبيبي ياريت ماكننا اتقابلنا
ولا يوم للحب سلمنا
ياريته الحب ماكان

لاهنرج بعمرنا من تاني
ولا هنعيش غير اماني
أيام م الزمن غواني
تعمل ايه لقلب سنين عطشان
دي حاجه يادوب بتصبر
وتشوقتي لحضنك اكر
وتخليني طول الوقت بفكر
وخيالي معاك في كل مكان
بس مش دي الحقيقة
ولا بقول قلوبنا بريئه
نفسها تعيش الحب لودقيقه
حبيبي هو ه باقى اد اللي كان
ياريت ياريت

أكثر م الهم

مفیش اکثر م الهم ع القلب
وعلي كل لون ياباتسطه
العيشه بقت مرارو غلب
وكل حاجه عايزه واسطة
بلدنا مبقتش لينا ده عيب فيها ولا فينا
لقمة العيش عايزة حرب
مش من حقك يامعلم
ولانت اللي عامل فيها اسطي
دنيتنا صبحت غابه مفیش مكان للغلابه
ضماير عايزة طبابه خلت جبال الديون
فوق راسنا حطه وربك بالعباد عالم

وهايجي يوم ع كل ظالم
قطر الحياة مهوش دايم
مهما طالت الرحلة لآبد
مايرسي وتنزل اقرب محطه

علي فكره

علي فكرة إنت محبتيش

واللي بشوفه ده حبي ليك

شكرا حبيبي ان إنت مجرحتيش

وحببت حبي انا فيك

بتسيبني علي راحتني اتكلم

وبتحض ايديا لما بسلم

وكأن الحب والشوق ماليك

بتحبني وقت ماتشوفني

وابعد تنسي إنك تعرفني

ودي اكثر حاجة بتخوفني

غير اني بضعف قدام عنيك

وعشان كده ها بعد يارب قويني

وان شفتك هاخبي شوقي وحنيني

لحسن تلمح دموع عيني

مش عايزة اصعب عليك

حبني زي انا ماحبك

ولو إحساسك من وراء قلبك

إرأف بحالي لا ده مش ذنبك

انا هتحدى قلبي اللي خلاني

لعبه ف ايديك

ا

مين ده ؟!

مين ده اللي هل علينا وبان
مين اللي فتح للقلب ببيان
ده القمر اللي اسمه عبدالرحمن
سبحان اللي خلق و صور
جمال وخفه بدر منور
ورقة ملك مش انسان
حبيب تيته وحبيب جده
في الغلاوه مفيش قده
خد كل الحلاوة لوحدده
عليه ابتسامه تروي العطشان
حبيبي لوحتي بيبيكي

عيونه الحلوة دي . بتحكي
وتسبق ماما وتشكي
قال ايه مش عارف منها ينام
ياتري اصدق مين ومين الغلطان
اكيد ماما مش برضوا كدة
انا عارفة يا حبيبي ومتاكده
وبقولها وانا كلي رضا
ماما مين طبعا طبعا إنت الكسبان

ياللي عمرك

ياللي عمرك ماجبرت لي خاطر
ولا قلبك رد لقلبي مره نداء
وانا اللي بقلبي كنت بخاطر
وقدمتولك هديه وكبش فداء
دلوقتي انا بدفعالتمن
جزاء قلبي اللي إنتمن
ناس مبتعملش حساب للزمن
وعلي القسوة دايماً متعوده
عايشه وميته ع الدنيا
ولا عارفه انها فانيه
والعمر بيضيع في ثانيه

وده حال الدنيا كده
كل شيء له نهايه
واديتك من عمري كفايه
من غير غرض ولا غايه
عايزه بس انول الرضا
وانت بتكنز مالك عمال
تقسم وتجمع وتطرح
عد علي قلبك وافرح
وملكش في قلبي مطرح
ومفيش حياة بالشكل ده

واحشني كثير ياغالي

وحشني كثير ياغالي

وحياتك قول تعالي

مقدرش اتحمل بعدك ثانيه

تسبيني إزي ايام وليالي

شوف بقالي كام سنة

استني ترجع تاني هنا

تسكن قلبي يانور عيوني

ياحضن مليش عنه غنا

البعد ده فوق احتمالي

وحشني كثير ياغالي

انا ياما ياما بشتاق لك

وليل ونهار بندهلك
هوه ده ذنب قلبي انه فتح لك
اول ماسمع بدق قلبك
لما كان صوته عالي
بيقول وحشني كتير ياغالي
تعالى ومتقولش بكره ولابعده
انا لاحمل نار الشوق ولا اده
والصبر خلاص جاب اخر حده
قول اشوفك امتي وفيين
واسأل قلبك وشوف ايه رده
ولو هو داري بحالي
قوله وحشني كتير ياغال

ليه الأيام

ليه الايام وخداك مني
مش برضوا دي حاجه تضايق
مش عايزة حاجة تبعدك عني
ولاحتي ثواني ولاحتي دقائق
حبيبي خليك جمبي متقلش لا
انا ليا في قلبك الف حق
يرضيك ازعل اموت اطق
الشوق ناره قايده وقلبي م طابق
حبيبي ياللي اناروحي دايبه فيك
قرب تعالي واسعدني بلياالك
وحياة قلبك والحلوه عنيك

انا بچلم ولا دي حقايق
حبيبي حياتي انا بعشقتك
وعيب قلبي انه مصدقك
وقبل ماتقرب قلبي ببسبقتك
وانت سايق فيها وبالك رالايق
حبيبي هوه شوقنا ملوش مدي
كان لينا فين ومن امتي ابتدا
معقوله في حب زي حبا كده
لا يا حبيبي ولا بالشكل ده ممكن اصدق
انا بحك حب فاق الحد
لا خطر علي بال ولا حسه اي حد
حب فوق مستوي البشر يا اجمل
ملك من عبيرك بيتعطر الورد
واقول بحبك لا لا دنا بعشق

لقيت فيك كل اللي بتمناه واكثر
حب ابعد من الخيال واكبر
يحلم معاك قلبي وقبل ما افكر
الاقى احلامي قدام عنيا بمتحقق
حبيبي هو ه في زي حبك حب
ولا قبلك ولا بعدك شاف القلب
اعذرنى ان قلت بعشق موش بحب
وبعذرك حبيبي لو موش هتصدق
ان شاء الله تحوز إعجابك

أنا بعشق من جديد

انا ايه بس اللي جرافي

من اول لمسة ايد

في لحظة اتغير حالي

وعشقت انا من جديد

الشوق كان اقوي مني

م الفرحة ياقلبي غني

انا بين ايديه حسيت كأني

لسه بعشق من جديد

شفت دمعته زي الندى

من شوق عيونه اللي ابتدي

يقول لعيوني كفايه كدة

خلى الحزن يبعد بعيد
انا بين ايديه حسيت كأني
لسه بعشوق من جديد
هوه لقانا كان ثواني
بس عندي بعمر تاني
حبيبي فاكر عمري وزماني
ولا نسي بينا المواعيد
جاني بشوق كل العاشقين
جاني من بعد غربة سنين
جاني دايب م الحنين
وكان لقانا ده اجمل عيد
وبين ايديه حسيت كأني
انا لسه بعشوق من جديد
انا لسه بعشوق من جديد

حرريني

حرريني من قيودك

وابعديني عن حدودك

انا خلاص مليت

تعبت من جحودك

قلبي مش ممكن يصدق

يجي يوم يهوي ويعشق

ولا عمره يتمني وجودك

الا لو الامر بايده هو

ولا حس الهوى هيزيده قوه

والقرار من صميم القلب جوه

اقدمه هدية لبستان ورودك

قلبي عاش طول عمره سيد
والهوي لو كان يقيد
يبقي ليه ابني امالي
او اعلي ولا اشيد
وانتي ابعده من وعودك
ازي ارضي لقلبي الهوان
او لحظة ضعف مهما كان
بس لواحد في عنيني الامان
وكنتي صادقة في عهدك
كنت احبك م البداية
حب موصول ملوشنهاية
يومها لو حبك هلاك
ابقي انا كل الضحايا
اللي يحيها وجودك

همسة شوق

اللي احنا فيه حاجه مش معقولة
نرجع بعمرنا لايام الطفولة
حبيبي ايه اللي جري لنا
وخلانا نبدأ من سنه اولي
من اول مقابلة وهمسة شوق
تطير بينا الاماني لفوق
ببساطه كده وبكل سهولة
كأني مفيش عمر عدي
وابتدي العمر من النهارده
والزمن لا جاب و لا ودا
وطول الوقت عليك مشغوله

اوعدني واللقاء قسمهونصيب
وجايز في مره تصيب
ونتقابل يا اعز واغلي حبيب
وابقي انا منك وعن حياتك مسؤله
بس متجيش على قلبك لو دق
وقول للحياه اه ليه لا
حبيبي ادي لنفسك حق
وجرب تلعب دور تاني
واستغني بلاش تأخذ بطوله
واعزني لو سرح بيا الخيال
وقلت يادنيا مفيش شئ محال
هنبني ونعلي جوانا الامال
تفضل احلامنا بالود موصوله

سبيك م الأحلام

حبيبي سبيك م الأحلام

احنا نقدر نحققها

هواك كدبه او هام قلبي انا صدقها

خيال حقيقة المهم نعيش

اهي حاجه احسن من مفيش

ثواني لو من الزمن نسرقها

من اد ايه مشتاقين ننسي عذاب السنين

وندوق طعم الحنين ونحب ايامنا ونعشقها

حبيبي ازي تبعد كده وليه

قلبي مابطل نداصعبان عليه

هوه العمر كله فيه اد ايه

يادوب ساعات حرام نضيعها
اللي باقي مش اد اللي راح
ولا في في الوقت براح خايفة من كتر الجراح
وقلوبنا مش حمل اهه
من القلب تحرقها

أيوه ياقلبي

ايوه ياقلبي مايتخافش عليك
النهارده بس رديت اعتبارك
اخذت تارك كده بايديك
،، وخلص ياقلبي بردت نارك
بجد هو يستاهل ،،، البادي اظلم
فاكرك ياقلبي ساهل ،، يبقي بيحلم
لازم تكسره وتحس بانتصارك
وتموت فيه الكبر والقوه
بحبة مكر وكيد من اللي هوه
ويعرف بسلامته تبقي مين حواء
وافتكروا خروجك م الجنة مكنش اختيارك

وحياة قلبي اللي داب حنين
وحياة عذابي لأندمه ع السنين
وادفعه تمن جرحك ودمعك ياعين
واصعب حاجه لوتبعد عنه ويكون دا قرار

غضب عني

غضب عني راضية بمصيري

ها بعد حبيبي وانا بعشقتك

احترت ما بين عقلي وضميري

ومن قلبي مشتاقه اسمعك

غصبت إحساسي ورحي

وقبلت اتحمل جروحي

وبكل حبي بودعك

ولوني صعب انساك وتنساني

وحبك ده اتخلق عشاني

ولو نداك الشوق ونداني

لازم ابعده واحاول امنعك

أرجوك متحاولش ترجع تاني
الحب طول عمره اناني
وان كنت تقدر إنساني
ابعد ايه بس اللي رجعتك
خلي حبنا ذكرى لايماننا
وصورة حلوه في احلامنا
مفيش غير كده قدمنا
وان قلت انساك اناهاخذك

كل ما أقول أشوفك إمتي

حبيبي حبيبي تقول قريب
وانت عارف مليش غيرك انت
بلمسه تداوي بهمسه تطيب
واه ياخوفي من قريب
وانا بصدق كل كلمه
وده عيب قلبي اكنهه طيب
هوه

لا يا حبيبي متخافيش
انا عمري م أوعد وموفيش
دي عيبه في حقي وابدأ متجيش
انا حبي ليكي خلاني

اشوف الدنيا شكل تاني

معقوله قلبك يطاوعك

ويقدر يوم ينساني

واه ياخوفي من قريب

هو

إنتي ساكنه جوه مني

أنتي شمسي وأنت ضلي

عمري يوم ما استغني عنك

هوه بعدك ايه فاضلي

هي

اه يا خوفي من قريب

خايفه ظني بيه يخيب

وانا بصدق كل كلمه

وده عيب قلبي لانه طيب

كامل معايا متسبنيش لوحدي
واحضن هوايا وخلي الشوق يهدي
هياالحياه ومن غير هوانا
تسوي ايه تقدر تقولي
وانا بصدق كل حاجه
وده عيب قلبي لانه طيب
واه ياخوفي من قريب
دانتي كل حاجه ليا
انتي روعي ونور عنيا
بحس روعي ضايعه مني
لوتغيبي في يوم عليا
الحياة ياروعي هيه احنا
واخده كتير من ملامحنا
حتي اسمي من حروفك

بس قولي امتي اشوفك
والحياة والدنيا تبقي لصالحنا

يعني سكت

اللي يعيش ياما يشوف
وانا بستني بشوق ملهوف
اسمع منك قبل مااشوف
قول يا حبيبي يعني سكت
هاستني الشوق هوه اللي يجيبك
وتقولي انا لسه حبيبك
ولو حتي علي قلبي كدبت
قول يا حبيبي يعني سكت
امتي ترجع ايامنا تاني ليه تقسي عليا وتنساني
قرب تعالي وقول وحشائي
ولا انت ع البعد قدرت

قول يا حبيبي يعني سكت
انا مش هاستني كتير
ولو ليا جناح كنت اطيير
كان حبك ليا حب كبير
ليه يا حبيبي منه هربت
قول يا حبيبي يعني سكت

ليه بتحكي

من كتر مابتحكي عنهم
خايفه يوم يجي عليا الدور
ابقي انا واحده منهم
ذكري وكلمه بين السطور
انا إحساسي قالي كده
وده اكثر من إحساس متاكده
شايفاك حبيبي كتير مغرور
وطالع علي برج عالي
ولا شايف للدنيا ليالي
والحب ملوش عزيز وغالي
هيجيلك لوقدامك ألف سور

وبكرة أفكرك وبقولهلك
راحة بالك مش دايمه لك
وبحزرك وياريتك تاخذ بالك
الحب نار مش دايمه جنه ونور

أحلم تاني ليه !؟

عايزاني احلم تاني ليه
وانتي اجمل حقيقه قدام عنيه
ولو احلم تاني هاشوف ايه
وايه اكثر من حبك ليا
كل احلامي خلاص حقتها
والدنيا بهواكي ملكتها
يافرحة ايامي وهنا لياليا
انتي الدنيا بكل مافيهها
وسنين عمري اللي مستنيها
واللي ابتديت احس بيها
واخاف عليها اد خوفك عليا

حبيبي انا حبيت الحب فيك
والشوق اللي باين عليك
وبدوب لو المس ايديك
واقول بحبك لا لا شوية

عشمتي ليه !؟

لما انا مش قد حبك
عشمتي ليه وقربتني ليك
فتحت لي باب قلبك
سكنتني ليه جوه عنيك
ليه خدتي بين احضانك
ليه دوقتني طعم حنانك
ليه تشغل قلبي بيك
لما انا مش قد حبك
إنت اللي قلت انا وحشاك
مشتاق لحبك وحضن هواك
والكلام ده كان برضاك

انا عمرى ماغصبت عليك
مش بقولك ارجع تعالى
وانت كل يومين بحاله
وانا وقلبي لا واستحاله
نحايل ولا نترجا فيك

كنت فاكِر

كنت فاكِر بنا ستار
او حتي سحاب وغيوم
اتاري مابنا جدار
وبيعلي يوم عن يوم
مش ممكن يجمعنا مكان
ولا يعود بينا الزمان
فراقنا قدر مقسوم
خلاص المشاعر اتغيرت
حتي القلوب اتحجرت
كنت بقول دي أو هام
ويمكن احلام لحد ما اتفسرت

العمر ضاع عتاب ولوم
واللي باقي منه يادوب ساعات
ليه نخليه دموع واهات
وندم علي حب فات
وفي ايدنا نهرب م الهموم
حبيبي مش مقسوم لنا
إن احنا نبقي لبعضنا
ولو القدر اختار بعدنا
ليه نرضي لعذابنا يدوم
فراقنا ده قدر مقسوم

افتكرني

عايزاك تفتكرني قبل ما افكرك بيه
ومن غير ماتفكر حبيبي رد عليا
قرب كمان هات عنيك في عنيا
بص لي وخليني جنبك شويه
حبيبي افتكرني انا مين
انا حب العمر كله والسنين
المسني وحس بالحنين
عبيرك لسه في ايديا
ولوها اسمحك ان انت تفكر
هيه ثواني وموش اكثر
انا حبي لك كان اكبر

وأسأل قلبك تلاقية حس بيه
افتكرت ولا أقول كمان
انا الشوق وانا الحنان
انا كنت لك حزن الامان
ولسه حبك احلي حاجه فيه

أعلنت الحب

لو اعلنت الحب عليك

حبيبي مش هتصدق

لوبينت الشوق جوه عنيك

لازم تحب واكيد لازم تعشق

حبيبي انا بعلن حب

وعن مشاعر قلب

هوه انا بعلن حرب

وفي الحاليتين مش هتفرق

لو يا حبيبي هواك مداري

جرب مره دوق من ناري

الحب لو كان باختيار

العمر كله يومين لونلحق
والقدر اقوي منك ومني
واحساسي قال بالنيابه عني
سلم واحضن ايديا طمني
متسبنيش لوحدي اغرق
ومتستهونش بحبي وعواطفي
وتقول دي نقطة ضعفي
انا دموعي سلاح في صفي
لوتغلبني دمعه وبشكوتي تسبق

ماعاش ولاكان

ماعاش ولاكان اللي يمسك
يام القلب الطيب والاحساس
طول عمرك رافعة حسك ،،، راسك
واوامرك ع العين وايديكي تتباس
كل العالم باسمك غني
وقالو عنك احلي جنه
وتاريخ يشرف بين الناس
مصر يا ام الجدعان
يامصر يا حاضن لكل الأوطان
نيك بيروي العطشان
وده مش بس كلام وخلص

وانا مش بكلامي هوصفها استحالة
ياللي عايز تعرفها اتفضل تعالي
بنفسك هتشوف ارض بتطرح رجاله
سمار الشمس زادهما قوة وحماس
هوه ده المصري بكل فخر
يقوت في الحديد والصخر
ويرفع علمك يا غاليه يامصر
لوع الشوك عدي وداس

أحكم بالعدل

احكم بالعدل ياسيدي القاضي
والادله كام مليون جعان من كل وادي
وكام مليار في بنوك الاعادي
هو نهب ارضي في شرعكم حلال وعادي
احكم بالعدل يا سيدي القاضي
انا مصر ليه باليدكو تسقوني المر
مستهلش منكو كل ده قتل مستمر
اوقف بحور الدم واشتري عمر
علي عمري فداء وهديه لاولادي
واحكم بالعدل ياسيدي القاضي
انا ام علي ضنايا قلبي اتحرق

والدليل واضح مش لازمه ورق
اطفال وشباب عمرها اتسرق
ودمها في كنيسه وجامع وميدان ونادي
احكم بالعدل يا سيدي القاضي
القضية قضية تار ودم
والقصاص العاجل وكفايه لازم نهتم
اسمع كدة بكاء وانين وصرخة ام
بعد ماحضنها صبح فاضي
احكم بالعدل ياسيدي القاضي
ارجوك حط نفسك مكاني
واللي انقتل ابنك مش حد تاني
اكيد هتنتهي المسأله في ثواني
والقاتل يقتل طول ماهو البادي
واحكم بالعدل ياسيدي القاضي

انا بريئة من كل ابن عاق
خاين عديم الشرف والاخلاق
واللي في الظلم عدي وساق
قلبي وربي عليه مش راضي
واحكم بالعدل ياسيدي القاضي

إنتو مين؟!

انتو مين ياللي ماليكو مله ولادين

ولاتعرفو ابداعن حاجه اسمها

بني الدمين

انتو خونه اتباع

عملا تشتري وتتباع

ارهاب خسيس وافكار دنيئه

كل الاديان من افعالكم بريئه

انتو مين انتواخوان الشياطين

وصلت بيكو القسوة والجبروت

في امن مكان نسيتمو ان لله بيوت

للعباداة والصلاة مش للموت

انتو مين انتو اخوان الشياطين.
باي حق ياعديم الرحمة قولي
بتهلل وتكبر بااي عين ترفع صوتك وتعلي
استحي من ربك دي ناس في بيته بتصلي
حسبها الله والقاتل يقتل لوبعد حين
انتو مين انتو اخوان الشياطين
دي مصر اللي فتحت لكم قلبها وبابها
جزائها الغدر وتقتولو اطغالها وشبابها
منكو لله وخساره فيكو حبة ترابها
تتاوي رممكو وانتو ع المشانق معدومين
اخرتكو سوده ياتجار الدم باسم الدين
ان شاء الله تعمو وتتشلو يافجرة
عديتو حدود الله كنيسه وجامع الف حسرة
ولسه شيوخنا بتقول مسلمين مش كفره

ملعون ابوهم افتونا دول دينهم اسمه ايه
المسلم من سلم الناس من لسانه ويده
واللي يقول غير كده قطع لسانه ويده
وربنا يجازي اصحاب الفتن ومن ايده
سفاحين بيستحلو دم البشر أجمعين
فعلا اخوان اخوان الشياطين
مفيش عقول ممكن نخاطبها
وقلوب من حجر ازي نستعطفها
مش بشر اللي قتلت الفرحة يوم عيدها
ومش مصر اللي يكسرها شوية خاينين
ولا ابلسه ولا جن ولا اخوان الشياطين
وموتوا وانتحرو واتفجرو عشان الكرسي
ويوم القيامة اطلبو الشفاعة من مرسي
استغفر الله ده اللي صلي بالنبي عليه

الصلاة والسلام ده كان حلم واحد مش
متغطي مش كلامي كلام اخوان الشياطين

نفسى أعيش اللحظة معاك

نفسى احس بحضن هواك

حبيبي انا زي كل البشر

مين قال لك اني ملاك

بلاش نعاتب ونلوم

محدث مننا معصوم

حبنا ده قدر مقسوم

ولو تقدر تبعد ابعد

بس انا مش وياك

في حاجات ملناش فيها

ولادايما هنتغلب عليها

اللي نظرة عيوننا بتصحياها

طول ما انت شايفني وانا شيفاك
حبيبي تعالي لحناتك خدني
وخليني جوه قلبك او عدني
ولايوم هتفارق حضني
يا عمري اللي ابتدي لحظة لقاك

أنا لسه ماسمعتهاش

حبيبي انا لسه مسمعتهاش

لمسة إيدك قالتها

وانت ليه مابتقولهاش

هيه كلمه بيها الحياة تتعاش

حبيبي استني ايه تاني

العمر لحظة بيمر زي الثواني

ولو سنين في حبك متقضناش

ماهي نظرة عنيك بتقول

كلام كتير وشرحه يطول

غير حياتي وانت المسؤول

عن قلبي اللي راح ولا جاش

بقي حبك بيجري في دمي
لما لقيت همك ما هو برضوا همي
قولت لو نقسم الحزن ما بينا
هيبقى فرحه يا ابن عمي
ودنيا من غيرك ماتحلاش
تعالى نعيش ماضيعش وقت
النهارده قبل بكره ياريت دلوقت
الحب حلم جميل وانا ما صدقت
القدر يجمعنا احنا مخطرناش

قالوا علينا

قالو علينا دول عيال بيلعبو
رشوهم بالميه وبالنار اضربو
يومين تلاته يخافو ويهربو
طلعو رجاله في الصخر بتفوت
لا همها ضرب ولاحتي موت
ليها هدف وليها صوت
علي اكثر وزاد عنادهم قربو
ده كان رايبهم مش رأي حد
صبرو في الشتاء وعز البرد
كان غطاهم السماء وفرشهم الارض
تحدي فراعنه او عو تستغربو

سهررو وعلل حسهم الكل نام
وقدرو بصوتهم يغيرو النظام
تحله ليهم وتعظيم سلام
للي ضحو عشانا واتغربو
كلنا نقف واحنا بنحيهم
حداد لرحهم الطاهرة فخربيهم
دول خلو الكل اترعبو واتكهربو
يام الشهيد كلنا ولادك احنا جمبك
وعلل الفراق ربنا يصبر قلبك
ابنك في الجنة وعد ربي وربك
ومن ايد النبي شربه هنيه بيشربو
العيال قامت واهو جه دورها
والكبار نامت وانطفي نورها
اتحامو في مناصب اتهد سورها

والحق ظهر وبان وداقو الذل وجربو
واوعو تستغربوا

أنا آسفه

انا اسفه اتعديت الحدود
وعشت حب ملوش وجود
كان وهم في خيالي
اتهيالي انه وعود
اسفه اتعديت الحدود
أسف علي كدبه كدبه صدقتها
وكلمه صادقه انا قولتها
مكنش ابدأ ابدأ وقتها
انا من الخيال رسمت ورود
اسفه حبيبي اتعديت الحدود
اسفه علي حسن نيّتي
وظني انك امل حياتي ودنيّتي

اسفه علي احساس قلبي وحنيتي
وانت قابلته بكل جحود،،،،،
اسفه حبيبي اتعديت الحدود
انا بندم ع الوقت اللي سرقتني
وعلي شوق القلب اللي سبقني
حبيبي إنت الخسران صدقتني
خسرت حب نادر في الوجود
اسفه حبيبي اتعديت الحدود
كنت بضعف علي اد محبتي
وهانت عليا نفسي وعزتي
ودي غلطة وانا هاتحمل غلطتي
مش هارجع لحبك تاني واعدود
اسفه حبيبي اتعديت الحدود

السيرة الذاتية



من مواليد السكاكيني بالظاهر
كان والدها إمام مسجد بالظاهر
ولدت من جذور صعيدية
بقرية زرنِيخ. مركز إسنا. محافظة الأقصر
هي أول من أسس ندوة ثقافية بقصر ثقافة منشية ناصر

في عهد جودت سباق رئيس قصر ثقافة منشية ناصر حينها
أول من حصل على شهادة تقدير على ورق البردي
لها لقاء على قناة أي بي سي
ولقاء في برنامج أيماننا الحلوه ومداخله على قناة المحور
نشرت لها العديد من الصحف منها. جريدة الحره اليوم
وجريدة الوطن والعربي الناصري ونصف الدنيا
لها كليب مصور من الشؤون المعنوية للقوات المسلحه
باسم خلفتي يامصر ألحان الفنان حسن دنيا..
وأغنية للأم من ألحان حسن دنيا

محتوى الكتاب

| | |
|----|-------------------------|
| 2 | بطاقة الكتاب |
| 3 | الإهداء |
| 4 | خلفتى يامصر |
| 6 | إفرحى يامصر |
| 8 | مصر بتنادى |
| 10 | خلصت خلاص |
| 12 | أشوفك ثانية |
| 14 | خساره فيك |
| 16 | بنت عمرى |
| 18 | إفرحى يامصر يامه واتهنى |
| 20 | يرضى مين |
| 22 | كان أملى |
| 24 | هوه لسه فيه وقت |
| 26 | إحنا شباب 25 |
| 29 | إزاي عدت عليك |
| 31 | نفضها سيره |
| 33 | ياريت |
| 35 | أكثر من الهم |
| 37 | على فكره |
| 39 | مين ده |
| 41 | ياللى عمرك |
| 43 | واحشنى كتير ياغالى |
| 45 | ليه الأيام |

| | | |
|----|-------|------------------------|
| 48 | | أنا بعشق من جديد |
| 50 | | حررينى |
| 55 | | همسة شوق |
| 54 | | سيبك من الأحلام |
| 56 | | أيوه ياقلبي |
| 58 | | غصب عنى |
| 60 | | كل ماقول أشوفك إمتى |
| 64 | | يعنى سكت |
| 66 | | ليه بتحكى |
| 68 | | أحلم تانى ليه |
| 70 | | عشمتنى ليه |
| 72 | | كنت فاكّر |
| 74 | | افتكرنى |
| 76 | | أعلنت الحب |
| 78 | | ماعاش ولا كان |
| 80 | | أحكم بالعدل |
| 83 | | إنتوا مين |
| 87 | | نفسى اعيش اللحظة معاك |
| 89 | | أنا لسه ماسمعتهاش |
| 91 | | قالوا علينا |
| 94 | | أنا أسفه |
| 96 | | السيره الذاتية للشاعرة |
| 98 | | محتوى الكتاب |